

上元縣志卷九 學校序

學校序

古先聖王建立學校其始未嘗有士與民之分也周官司徒掌邦教以佐王安擾邦國性之善出於天因而導之曰安習之偏成於人矯而馴之曰擾大君財成輔相以致一世之隆平者其本在是而謂天下之大有一人之不學可乎故鄉黨州閭無地而非學也州長黨正無人而非師也師田行役飲射讀法無時無事而非教也漢書食貨志云春令民畢出在野冬則畢入於邑春將出民里胥平旦坐於右塾鄰長坐

上元縣志

學校序

一

於左塾畢出然後歸夕亦如之入者必持新樵輕重相分班白不提挈蓋先王設教其廣博周浹範圍天地之化有如是者降及二漢去古未遠鄉官之設猶能起教於閭里於時縣邑不設師儒之官其民之秀異者則長吏以告二千石二千石察其可者與計偕於京師得詣太常補博士弟子亦古諸侯歲貢士於天子之比也隋唐以還縣令而下無職以司教化雖嘗置學設官而不以教民百姓不聞德義之訓久矣蓋士之與民至後世始分而膠庠之設僅爲取士之具亦至後世而始然也善乎馬端臨有言曰曰郡守

曰縣令則吏所以治其民曰博士官曰文學掾則師所以教其弟子二者漠然不相爲謀民何由而見先王之治哉我

朝治教之盛比隆三代

聖天子臨雍講道薄海向風直省大小庠序以及會城書院靡不經畫盡善垂範無窮

世宗憲皇帝睿慮周詳欲補學校所未及迺頒萬言廣訓於天下

命有司朔望宣講以化民成俗誠所謂過化存神上下與天地同流者與志學校第五其目凡八

上元縣志

學校序

二

宸翰

儒學

廟祠

禮樂

經籍

學田

學額

府學

以下附

書院

社學

上元縣志卷九 學校

宸翰

世祖章皇帝 欽頒學宮卧碑 順治九年

朝廷建立學校選取生員免其丁糧厚以廩膳設學院
學官以教之各衙門官以禮相待全要養成賢才以
供

朝廷之用諸生皆當上報

國恩下立人品所有教條開列於後

一生員之家父母賢智者子當受教父母愚魯或有
非爲者子旣讀書明理當再三懇告使父母不陷

上元縣志

卷九 宸翰

於危亡

一生員立志當學爲忠臣清官書史所載忠清事蹟
務須互相講究凡利國害民之事更宜留心

一生員居心忠厚正直讀書方有實用出仕必作良
吏若心術邪刻讀書必無成就爲官必取禍患行
害人之事者徃徃自殺其身常宜思省

一生員不可干求官長結交勢要希圖進身若果心
善德全上天知之必加以福

一生員當愛身忍性凡有官司衙門不可輕入卽有
切已之事止許家人代告不許干與他人詞訟他

人亦不許牽連生員作証

一爲學當尊敬先生若講說皆須誠心聽受如有未明從容再問毋妄行辨難爲師長者亦當盡心教訓勿致怠惰

一軍民一切利病不許生員上書陳言如有一言建白以違

制論黜革治罪

一生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

聖祖仁皇帝

御製學校論

康熙二十三年 頒

上元縣志

卷九

宸翰

二

治天下者莫亟於正人心厚風俗其道在尚教化以先之學校者教化所從出將以納民於軌物者也是以古者家有塾黨有庠術有序國有學人生八歲自王公以下至於庶人之子弟皆入小學及其十有五則自元子衆子以至公卿大夫元士之適子與凡民之俊秀皆入大學蓋自家至平國莫不有學自天子至于庶人莫不學自幼至於長莫不皆學凡學有詩書禮樂以爲之本干戈羽籥以爲之文父子君臣長幼之道於是焉觀之六德六行之教於是焉取之所以淑其耳目手足之舉措而養其心以復其性以

爲脩已治人之大者可謂備至矣是以當時之君子履信思順以事其上小人亦皆樂循禮而耻犯法鞭撻不事而至治以興後世學校寢廣博士之塗寢繁所以立教之方失先王之遺意士之遊其中者直以爲利祿之階欲期道德之一詎不難哉且夫今之所謂教者誦讀焉而已爾而又弗實致其力以防其放僻邪侈之心使氣之充而識之明以漸求復其性其何以爲脩已治人之道哉故曰教隆於上化成于下教不明於上而欲化成於下猶却行而求前也教化者爲治之本學校者教化之原欲敦隆教化而興起

上元縣志

卷九 宸翰

三

學校者其道安在在務其本而不求其末尚其實而不務其華以內行爲先不汲汲於聲譽以經術爲要不屑屑於文辭如是則於聖人化民成俗之道庶乎其有當也夫

聖祖仁皇帝

御製訓飭士子文

康熙四十一年

國家建立學校原以興行教化作育人材興至渥也朕臨御以來隆重師儒加意庠序近復慎簡學使釐剔弊端務令風教脩明賢才蔚起庶幾樸棧作人之意乃比年士習未端儒效罕著雖因內外臣工奉行未能盡善亦由爾諸生積鋼已久猝難改易之故也茲

特親製訓言再加謹飭爾諸生其敬聽之從來學者
先立品行次及文學學術事功原委有叙爾諸生勿
聞庭訓長列宮牆朝夕誦讀寧無講究必也躬修實
踐砥礪廉隅敦孝順以事親秉忠貞以立志窮經考
業勿雜荒誕之談取友親師悉化驕盈之氣文章歸
於醇雅毋事浮華軌度式於規繩最妨蕩佚子衿佻
達自昔所譏苟行止有虧雖讀書何益若夫宅心弗
淑行已多愆或蜚語流言脅制官長或隱糧包訟出
入公門或變撥姦猾欺孤凌弱或招呼朋類結社邀
盟乃如之人名教不容鄉黨弗齒縱幸脫褫扑濫竊

上元縣志

卷九 宸翰

四

章縫反之於衷寧無愧乎况乎鄉會科名乃掄才大
典關係尤鉅士子果有真才實學何患困不逢年顧
乃標榜虛名暗通聲氣夤緣詭遇罔顧身家又或改
竄鄉貫希圖進取囂凌騰沸網利營私種種弊端深
可痛恨且夫士子出身之始尤貴以正若茲厥初拜
獻便已作姦犯科則異時敗檢踰閑何所不至又安
望其秉公持正爲國家宣猷樹績膺後先疏附之選
哉朕用嘉惠爾等故不禁反復惓惓茲訓言頒到爾
等務其體朕心恪遵明訓一切痛加改省爭自濯磨
積行動學以圖上進國家三年登造束帛弓旌不特

爾身有榮卽爾祖爾父亦增光寵矣逢時得志寧俟
他求哉若仍視爲具文玩愒弗儆毀方躍冶暴棄自
甘則是爾等真頑無知終不能率教也旣負栽培復
干咎戾王章具在朕亦不能爲爾等寬矣自茲以往
內而國學外而直省鄉校凡學臣師長皆有司鐸之
責者並宜傳集諸生多方董勸以副朕懷否則職業
弗修咎亦難追勿謂朕言之不預也爾多士尚敬聽
之哉

世宗憲皇帝

上諭 雍正十一年

上元縣志

卷九

宸翰

五

各省學校之外地方大吏每有設立書院聚集生徒
講文肄業者朕臨御以來時時以教育人材爲念但
稔聞書院之設實有裨益者少而浮慕虛名者多是
以未曾勅令各省通行蓋欲徐徐有待而後頒降諭
旨也近見各省大吏漸知崇尚實政不事沽名邀譽
之爲而讀書應舉之人亦頗能屏去浮囂奔競之習
則建立書院擇一省文行兼優之士讀書其中使之
朝夕講誦整躬勵行有所成就俾遠近士子觀感奮
發亦興賢育才之一道也旨撫駐劄之所爲省會之
地着該督撫商酌舉行各賜帑金一千兩將來士子

羣聚讀書須預爲籌畫資其膏火以垂永久其不足者在於存公銀內支用封疆大臣兼有化導士子之職各宜殫心奉行黜浮崇實以儲國家菁莪棧樸之選如此則書院之設有裨益於士習文風而無流弊乃朕之所厚望也特諭

今上皇帝

上諭 乾隆元年

書院之制所以導進人才廣學校所不及我

世宗憲皇帝命設之省會發帑金以資膏火恩意至渥也

古者鄉學之秀始升於國然其時諸侯之國皆有學

上元縣志

卷九 宸翰

六

今府州縣學並建而無遞升之法國子監雖設於京師而道里遙遠四方之士不能胥會則書院卽古侯國之學也居講席者固宜老成宿望而從遊之士亦必立品勤學爭自濯磨俾相觀而善庶人才成就足備朝廷任使不負教育之意若僅攻舉業已爲儒者末務况藉爲聲氣之資游揚之具內無益於身心外無補於民物卽降而求文章成名足希古之立言者亦不多得寧養士之初指耶該部卽行文各省督撫學政凡書院之長必選經明行脩足爲多上模範者以禮聘請負笈生徒必擇鄉里委異沉潛學問者肄

業其中恃才放誕佻達不羈之士不得濫入書院中酌倣朱子白鹿洞規條立之儀節以檢束其身心倣分年讀書法予之程課使貫通乎經史有不率教者則擯斥勿留學臣三年任滿諮訪考檢如果教術可觀人才興起各加獎勵六年之後著有成效奏請酌量議叙諸生中才器尤異者准令薦舉一二以示鼓舞特諭

儒學

按光武時李忠為丹陽太守始起學校吳景帝詔置學官晉立太學於秦淮水南宋元嘉中立儒學

上元縣志

卷九 儒學

於北郊太始中置總明觀齊梁因以為國學俱詳古蹟南唐瀆秦淮開國子監以上諸學非縣邑所當追溯不獨其詳不可得而聞也上元之有學當以南宋寶祐為始

舊儒學在今縣治東按京城圖志云存義街即上元學基宋寶祐戊午東陽陳寅宰邑始以廢圃為官梁椅撰記景定二年知縣鍾蜚英創建學宇元至元中縣尹田賢重脩進士李桓記明洪武初府學既建省縣生儒入焉而舊學遂廢

今儒學即宋景祐所創建康府學也建炎兵燬紹興

淳熙間重脩淳祐中趙以夫更命教堂曰明德元
設集慶路學於宋學故地行臺御史楊演有記明
初改爲國學已而復爲應天府學以上元江寧二
縣學省入增二齋訓導及生員廩膳之數永樂六
年廟學災宣德七年守臣襄城伯李隆府尹史怡
重建少傅楊榮爲之記成化七年復燬提學御史
復建卽尊經閣爲後堂尹魯崇志成之弘治間尹
秦崇以石堤障秦淮水正德間尹白圻繚以石檻
嘉靖初都御史陳鳳梧平學後山重建尊經閣增
敬一亭侍讀黃佐有記萬歷三年濬月河以石甃
岸易學前戶部地爲屏牆十四年太常寺少卿周
繼署府尹事造青雲樓於學舍之北建天下文樞
坊及聚星亭於廟之前焉後屢加重脩

國朝定興改爲上元江寧兩縣學規模悉從府制康熙
五年奉

聖諭地方官以學宮興廢入考成五十四年安徽布政使
張聖佐重脩尊經閣五十八年江蘇按察使李馥
捐脩文廟復建青雲樓俱自爲記

廟祠

先師廟在櫺星門內

按櫺星門自古來無說不知何以聖廟用之又古志櫺俱作靈此亦

上元縣志

卷九

儒學

八

當明德堂前宋雍熙中有文宣王廟在府西
城故基天聖七年太守張士遜徙廟于浮橋東北
景祐中改建今學內紹興六年脩江賓王記淳祐
六年增造兩廡以妥從祀元至大二年重脩盧摯
有詩御史劉泰有脩祭器記明宣德七年重建大
成殿正德間重脩王守仁有記嘉靖間再脩湛若
水有記更大成殿名先師殿康熙二十三年

聖祖仁皇帝御題萬世師表匾額雍正三年
世宗憲皇帝御書生民未有匾額乾隆三年

今上皇帝御書與天地參匾額皆頒懸于殿中康熙五

上元縣志

卷九 廟祠

九

十一年奉

旨升附朱子於十哲之次稱先賢五十三年以宋范仲淹
從祀兩廡雍正三年

詔增先賢蘧瑗林放秦冉顏何牧皮縣亶公都子樂克公
孫丑萬章先儒鄭康成諸葛亮范甯尹焞黃幹陳
淳何基魏了翁趙復許謙金履祥陳澔羅欽順蔡
清陸隴其從祀又升周敦頤張載程顥程頤邵雍
爲先賢雍正三年

詔郡縣祭孔子俱得用太牢

崇聖祠原名啟聖在 明德堂左明嘉靖十年增建

命加封先師五世王爵肇聖王木金父裕聖王祈父貽聖
祀聖父叔梁紇以先賢顏無繇曾點孔鯉孟孫氏
配享以先儒周輔成朱松等五人從祀雍正元年
王防叔昌聖王伯夏啟聖王叔梁紇兩廡增宋儒
張迪從祀

名宦祠在儒學左明正德九年建祀漢魏相何武李
忠晉褚爰唐顏真卿宋呂蒙正張詠范純仁程顥
楊邦乂趙鼎岳飛朱熹劉珙真德秀汪立信明胡
亮許存仁張純周忱孫鼎顧佐鄺埜陳邁王恕戴
珊魯崇志林塘婁謙陳琳鄭汝舟鄧德昌王爨孫
上元縣志

卷九 廟祠

十

懋楊宜王道龐嵩周如斗耿定向海瑞汪宗伊陳
貞張履正柯挺黃承元丁賓李棠鄭璧周起元楊
以任馮叔吉錢士貴蔚綬陳玉輝

國朝麻勒吉郎廷佐董訥梁化鳳邵嘉曹璽張顧行王
緒祖簡上邵嗣堯馬國柱張榕端許汝霖張泰交
熊一瀟余正健施世綸陳彭年李馥李衛張璣馮
如京陳起龍馬鳴珮陳培貞

鄉賢祠在學右亦正德九年建祀吳張昭唐固晉紀
瞻賀循王導顏含王諒陶回張闔樂道融謝安宋
劉瓛齊陶子鏘梁太子統宋秦傅序李琮胡銓秦

鉅元楊剛中明陳遇孫炎杜環張益王一居李時
勉童軒倪岳賀確陳鎬陳欽何遵劉麟梁材顧璘
周金邵清王以旂王鑾殷邁許穀沈九思李逢陽
楊希淳焦竑何世守李登吳自新顧璟

明道先生祠見後書院

周公祠祀明衡府紀善周是修建文之變是修自繼
於尊經閣下萬歷中建祠祀焉又見祠祀

禮樂

祭品

先師

上元縣志

卷九

禮樂

十一

帛一 爵三 牛一 羊一 豕一 登一 鉶

二 簋二 簋二 籩十 豆十 尊一

四配

各帛一 爵三 羊一 豕一 鉶一 簋二

簋二 籩八 豆八 尊一

十哲

帛各一 爵三 豕一 鉶各一 簋各一 簋

各一 籩各四 豆各四 豕首一

朱子同

東西廡

帛一 爵各一 豕三 每案簋一 簋一 簋
四 豆四

崇聖祠

帛一 爵三 羊一 豕一 劔一 簋二 簋
二 籩八 豆八 尊一

配

帛二 豕首一 每位爵三 簋一 簋一 簋
四 豆四 豕肉一

兩廡

帛二 每位爵三 簋一 簋一 籩四 豆四

上元縣志

卷九 禮樂

主

豕肉一

按帛以奠獻太羹實諸登和羹實諸劔黍稷實諸簋稻梁實諸簋形鹽藁魚鹿脯棗栗榛菱芡黑餅白餅實諸籩韭菹芹菹菁菹笋菹醢醢鹿醢兔醢魚醢脾胘胎實諸豆

樂章

迎神奏咸和之章 無舞

大哉至聖道德尊崇維持王化斯民是宗典祀有常精純並隆神其來格於昭聖容

初獻奏寧和之章 有舞

自生民來誰底其盛惟師神明度越前聖粢帛具成禮容斯稱黍稷非馨維聖之聽

亞獻奏安和之章 有舞

大哉聖師實天生德作樂以崇時祀無斁清酤惟馨嘉牲孔碩薦羞神明庶幾昭格

三獻奏景和之章 有舞

百王宗師生民物軌瞻之洋洋神其寧止酌彼金罍惟清且旨登降惟三於嘻成禮

徹饌奏咸和之章 無舞

犧牲在前豆籩在列以享以薦既芳既潔禮成樂備人和神悅祭則受福率遵無越

送神奏咸和之章 無舞

上元縣志 禮樂 卷九

十三

有嚴學宮四方來崇恪恭祀事威儀雖離歆茲惟馨神馭還復明禋斯畢咸膺百福

國朝乾隆八年禮部頒發樂章 春季夾鐘為宮倍應鐘起調秋季南宮為宮仲

呂起調

迎神奏咸平之章

大哉孔子先覺先知與天地參萬世之師祥徵麟紋韻答金絲日月既揚乾坤清夷

初獻奏寧平之章

予懷明德玉振金聲生民未有展也大成俎豆千古春秋上下清酒既載其香始升

亞獻奏安平之章

式禮莫愆升堂再獻響協鼗鏞誠孚鬯靡肅肅雝
雝譽髦斯彥禮陶樂淑相觀而善

終獻奏景平之章

自古在昔先民有作皮弁祭菜於論思樂惟天牖
民惟聖時若彝倫攸叙至今木鐸

徹饌奏咸平之章

先師有言祭則受福四海覺宮疇敢不肅禮成告
徹母疏母瀆樂所自生中原有菽

送神奏咸平之章

見繹峩峩洙泗洋洋景行行止流澤無疆聿昭祀
事祀事孔明化我蒸民育我膠庠

上元縣志

卷九 禮樂

十四

樂器

編鐘 編磬 楹鼓 鐘 琴 瑟 祝 敵 鳳

簫 鳳管 簫 笛 笙 塤 篪 搏拊 鼗

鼓

舞器

麾 節 翟 籥

謹按

國朝尊崇先聖定制郡邑初無異同江寧府學祭禮屢

經修明縣學大有未逮今姑錄郡學之制於此以俟他日補正云

經籍金陵志載宋建康府學中天聖紹興所賜書籍今不錄

江寧府志尊經閣舊寄貯明國學經史書樓所藏十三經二十一史通鑑綱目通典會典通考通志諸書板後漸殘缺以至於盡惟二十一史板以屢修尚存

國朝

上諭十六條康熙二十四年頒

御纂周易折中 朱子全書康熙四十九年頒

上元縣志 卷九 經籍 十五

御製萬言廣訓 朋黨論俱雍正三年頒 瑞穀圖雍正五年頒

上諭雍正八年頒

聖祖御纂書經傳彙纂 詩經傳說彙纂 春秋傳說彙纂

纂 性理精義以上四部雍正九年布政使司鑄板存貯閣中

大清律 學政全書 江西通志以上三書俱存板閣中

碑記附有十餘種重見古蹟

宋修昇州文宣王廟記紹興六年編修江賓王著

明道先生祠堂記朱熹游九言真德秀著馬光祖跋

江寧府移建康府學記張用元著見景定志今亡

重建建康府教授西廳記編修鄭自誠著

府學御書閣記游九言著

府學上舍登科題名記

府學贖送貢士規約碑嘉熙元年姑孰陶職軒江孔聖義立教授郡人

吳箴記

建康新建義莊記淳祐十一年制置吳淵置教授宋自強記

元加封孔子大成至聖文宣王碑至大元年

集慶路孔子碑記至大二年翰林學士盧摯著

建康路文廟祭器記至大三年監察御史劉泰著

修集慶路儒學記大德五年行臺御史楊演著

建康路學祭器總數記皇慶二年學錄胡助著

上元縣志

卷九 經籍

六

加封啟聖王及夫人碑至順二年

加封大成至聖文宣王夫人碑至順二年

加封顏曾思孟四賢碑至順二年

明勅建卧碑洪武十五年

歷代聖賢贊自伏羲至孟子十五人右都御史陳鳳梧著

玉兔泉銘御史中丞劉基著

又洪武五年禮部主事張孟兼著

玉兔泉聯句詩學士宋濂太常呂冲善參軍熊鼎職方劉崧虞部周子諒濂子遂同賦

賦書刻于泉上久失之教授張履正重刻

重建應天府學碑記宣德八年少傅兼大學士楊榮著

嘉言二碑 正統二年襄城伯李隆立

應天府學科第題名記 成化五年國子監祭酒周洪謨著

重建應天府學櫺星門上樑文 成化十八年學士倪謙著

明道先生祠堂記 弘治二年提學御史司馬聖著

應天府學續科第題名記 弘治五年吏部尚書林翰著

重修應天府學記 正德十年南京鴻臚寺卿王守仁著

先師孔子像 禮部尚書湛若水著

御製敬一箴碑 嘉靖五年

御注范浚心箴碑 嘉靖六年

聖諭碑 嘉靖六年

上元縣志 卷九 經籍

重建尊經閣記 嘉靖六年巡撫右都御史陳鳳梧著

御製正孔子祀典碑 嘉靖九年

重修應天府學記 嘉靖十七年南京吏部尚書湛若水著

應天府學題名記 嘉靖二十年教授胡儒著

重修應天府學記 嘉靖二十一年翰林院侍讀黃佐著

應天府學遂貢題名記 嘉靖二十三年教授鄭汝舟著

賀教授去官記 嘉靖二十三年南京禮部尚書霍韜著

應天府學新建東號樓記 嘉靖二十六年左春坊司直兼翰林院檢討

先聖小影 吳道子圖教授劉一夔跋

先聖大像

蔣子成画

重修應天府學記

嘉靖四十四年南京尚寶司許穀著

重修應天府學記

萬曆五年南京吏部尚書潘晟著

重修應天府學記

萬曆十四年南京工部侍郎方九功著

重修應天府學記

萬曆二十七年翰林院修撰焦竑著

續建府學題名記

萬曆二十八年教授張履正著

國朝

欽頒曉示生員卧碑

順治九年恭紀卷前

頌

御製訓飭士子文碑

康熙四十年恭紀卷前

頌

重修尊經閣記

康熙五十五年布政使張聖佐著

上元縣志

卷九

經籍

六

重修青雲樓記

康熙五十八年按察使李瓊著

秦泰山碑

李斯篆

秦繹山碑

李斯篆

吳天璽碑

皇象書董道黃伯思跋

晉右將軍蘭亭記

晁謙之刻置絢書閣三段石後壁間今亡

晉右光祿大夫西平靖侯顏府君碑

晉侍中右光祿大夫西平靖侯顏公太宗碑

俱顏

魯公書今燬

唐武后石室碑

今亡

宋王介甫此君亭詩

山谷城南帖

米元章詩

高宗御書孝經守臣晁謙之刻於郡學有謙之跋今亡

國朝

御製平定朔漠告成太學碑康熙四十三

御製平定青海碑雍正三年頒

學田

明嘉靖二十年提學御史馮天馭始置田一百四十九畝於縣北城鄉三圖萬曆十九年應天府尹邵仲縣繼置田一百九十八畝八分在縣丹陽縣七

上元縣志

卷九 學田

九

十圖又築圩田五百十四畝在縣盡節鄉三圖又歸罰田五畝於學在縣鳳城鄉提學御史耿定向墾田二十七畝地八畝二分在江寧夾岡門上鄉國朝雍正十年歸併上元徵租賦役全書共九頃九十二畝有奇徵租銀一百三十二兩九錢二分司釐有奇按此與前數微有不同江寧府志查此頃照舊徵催聽候學院項下支取刊刷考卷及賑濟本邑貧生之用

學額

明洪武二年詔府州縣皆立學府學四十八州學三

十人縣學二十人日給廩膳仍免其家差徭二丁
國朝順治五年定額府學六十名大學四十名中學二
十五名小學十二名

十五年定額府學二十名大學十五名中學十二名
小學八名

康熙二十八年定額府學二十五名大學二十名中
學十六名小學十二名

雍正元年定額人文最盛之地大學照府學中學照
大學小學照中學

武童歲科並試額取府學二十名大學十五名中
上元縣志

學十二名小學八名

江寧府學 以下附

府學故明之國學也洪武初以元集慶路學爲國學
後改爲應天府學十四年建國學于雞鳴山下名
國子監

國朝順治六年制府馬國柱請改爲府學奉

旨依議因大興修葺以國子監坊爲江寧府學坊規制宏
麗視外郡有加儒林之巨觀也十三年奉

旨省會丁祭布政司主祭其後屢經脩飭具詳府志康熙
四十五年織造使曹寅五十五年布政使張聖佐

雍正十三年制府趙弘恩俱重修

附丁祭木榜

原任江蘇布政使司鄂公爾泰撰凡八條今錄四條

為恭逢丁祭大典嚴飭各屬官司宜備物以告虔須先期而齋宿事竊以至聖先師萬世之師表也冠帶集團橋

天子有臨雍之典春秋屆仲月上丁修釋菜之儀內則命夫胄子三公外則寄於有司羣牧典綦嚴矣誰敢懈焉本司寄任屏藩職司典守前當春祀親齋沐而宿黌宮先令儒官校簿書而正祭器乃知牲或已經宰殺既失告全致潔之心物豈盡屬肥鮮

上元縣志 卷九 府學

三

更乖博碩蕃滋之義且或常供不充夫額數任先後以那移珍品不給於豆籩致鹽菹之雙疊兼聞各學亦有同風罔知共竭精誠但解奉行故事甚或尊罍未備疇詳犧象之形琴瑟雖陳莫辨敵篋之狀觀者如堵如堵任彼咆哮祭者似醉似癡頽然聾瞽一尊初薦滿庭之燎火無光三獻未終兩廡之燈輝已滅於是甌劍與簠簋悉憑顛倒几筵鹿兔共榛菱似遇摩空鷓雀分甘奪臚半由承祭之家人拍地喧天遑問糾儀之齋長廩增附學諸生怒髮衝冠與隸膳夫一片雄心染指凡此之類

罪豈勝誅皆由約束之不嚴亦以躬行之未善不思主鬯則身膺一命幸得窺聖人門墻分獻則職任半瓊原以司泮宮俎豆平時未知化導已蒙尸位之譏臨事不克恪恭難免曠官之咎爲此飭郡守州牧縣令等職亦以誠教授學正諭導諸員嗣後各精乃心以襄大典預期三日牲牷皆供乎餼牽先事一朝品物盡陳于頰璧齋戒沐浴來觀習樂試歌舞于明倫堂前料量潔清退服寢衣歛精神於尊經閣畔庶幾必誠必敬斯夙夜之惟寅無怠無愆知神人之威格是并申之條約用以頒諸

上元縣志

卷九 府學

三

學宮如左

一既奉

肇聖五王神位不惟簋簠簋籩豆照數增設卽牲牷亦應各增其四有議共牲者其說不可從考之典禮惟配享有可以共牲者專主無共牲之禮書云文王騂牛一武王騂牛一其明徵也自三代至漢唐皆不聞有共牲之說唐時祀五方帝且別以五色犢其異牲可知惟後漢有青帝赤帝共一犢白帝黑帝共一犢者祀之共犢非古也唐開元時五品以上室異牲六品以下共牲豈有王爵而可共牲

者乎其各照數增一爲五可也

一祭牲祭品皆有定額一品一籩罔可缺遺况牲
取親割以告虔也取其血毛以告全也可既宰而
入學門乎豕曰剛鬣註謂其豕肥則鬣剛羊曰柔
毛註謂其羊肥則毛柔弱此博碩肥脂之所由稱
也可以瘦瘠不堪之羊豕爲飲之灌之以充牲牲
乎既宰且不可瘦瘠且不可况可闕其額數而以
肥吏胥之囊橐乎月令曰犧牲無用牝又曰命宰
祝循行犧牲視全具按芻豢瞻肥瘠察物色必比
類量小大視長短皆中度五者脩當上帝其饗註

上元縣志

卷九

府學

三

曰上帝且歆饗之况羣神乎嗣後各官俱預先三
日親至學視牲牲如法然後稽其數使人牧之以
待先一夕親割吏雖奸其何所施乎

一各學祭器樂器俱照闕里志修理整齊不得因
陋就簡

一學宮之地聖賢靈爽所依不惟丁祭宜修治肅
清卽平時亦宜洒掃潔淨近見黌宮以內栽瓜種
菜學圃成澆灌之場晒被曝衣諸生絕往來之路
甚至丹楹刻桷徒洪蝙蝠棲遲鳥革翬飛盡是黷
廳巢穴蛛塵百斛廟貌埋埃垢之中颺糞千箕腥

穢聞宮墻之外皆已安之若素八且視爲當然甚至先儒先賢兩廡之神牌倒置鄉賢名宦兩祠之神位傾頽非其子孫有誰咨問加之朽蠹若罔聞知凡爾學官所司何職諸門役等多亦奚爲嗣後教官不時巡察務令門斗分班輪值逐日掃除學宮之內總不容有一毫塵垢庶無忝厥職也慎哉毋忽

書院

宋明道書院明道先生嘗爲上元主簿淳熙初留守劉珙祠之學宮朱文公熹爲記紹熙間主簿趙師

上元縣志

卷九 書院

五

秀又祀於其聽事之西偏嘉定己亥主簿危和請於太守劉渠改築新祠前護重門中嚴祠像扁其堂曰春風表其坊曰尊賢旣成行舍菜禮真德秀有記未幾廢爲軍儲賓寓之所淳祐中郡守吳淵更創依白鹿洞規聘名儒爲山長理宗賜御書明道書院額馬光祖姚希得增修元廢弘治間復祀於學嘉靖初御史盧煥始別建明道書院於鎮淮橋東北卽今祠焉按金陵志嘉定危和請創新祠於簿廨之東得鈐轄舊廨之地宜與今縣署相迎金陵圖考亦謂在上元縣東舊志又謂里仁街在

大中橋西明道書院故基是也或以今祠爲卽宋之書院故址非是

元南軒書院舊在天禧寺方丈後元至元中遷城東金陵志注在明道書院西南後廢

江東書院金陵志在城內永安坊鹽倉街至治初郡人王進德勸建地臨秦淮竹木脩茂置田以供贍

生徒翰林學士吳澄嘗於其中講授羣士從受業者甚衆泰定元年定今額後廢按基址宜隸江寧

昭文書院在湖熟鎮卽太子墓見古蹟宋咸淳中方拱辰匾曰昭文精舍至元中改今額後廢

上元縣志

卷九 書院

明新泉書院在長安街嘉靖初禮部侍郎湛若水建置田數頃以延四方之士萬歷初廢

崇正書院在清涼寺東提學御史耿定向建以講學並置學田今廢惟坊尚存

國朝鍾山書院在舊錢廠地雍正二年制府查公弼納創建規模壯濶中爲講堂會課有廳貯書有樓周以迴廊學舍左右鱗列百餘楹

世宗憲皇帝御書敦崇實學匾額賜之十年特頒諭旨乾隆元年續奉

上諭俱恭紀卷前制府尹公繼善並勒石堂上安徽布

政使晏公斯盛援國學例請增一子徒膳銀今制府黃公尤加意振厲上下江孝秀叢集肄業稱極盛焉山長廬江宋公衡高郵夏公慎樞常熟汪公應銓太倉沈公起元吳縣楊公繩武皆有記楊公設教最久歿後門人奉主於蒼聖廟內春秋祀之虹橋書院在鹽妃巷康熙二十一年制府于公成龍檄上下江名士肄業其中今廢

社學

舊志明洪武中每坊廂建社學一區以學行者舊爲之師教一坊子弟悉令通孝經小學諸書其俊秀

上元縣志

卷九 社學

美

者選入郡學鄉飲酒禮既舉於學每坊卽社學爲會飲之區以禮一方高年行禮讀法如儀未久而廢其基者小民佃居者入租於官餘多爲豪猾侵古不可盡考云

國朝康熙二十九年制府阿公山以縣治後錢廠舊基置義學并捐俸金四百兩取其息以延師儒雍正元年卽其地建鍾山書院於是分設義學於南北一在府學文廟後六年遷于縣學之青雲樓十一年復歸府學卽以訓導爲師一在龍神廟東六年遷于縣學忠義祠後復移龍神廟東尋上元監生

高官佑請於有司出已貲曾置一學數所脩防視
舊有加焉

上元縣志

卷九

社學

七